



姓韻卷五十

四紙下

李 見風俗通唐世系表

史記老子楚苦縣厲鄉曲仁里人名耳字聃姓李氏按唐世
系表利貞娶契和氏女生昌祖為周大夫家于苦縣五世孫
乾字元景為周上御大夫娶益壽氏女嬰敷生耳字伯陽一
字聃周平王時為太史著道德經八十一章一云理徵字利
貞孫仲師昌曾孫彤德碩宗乾也又云聃六世祖碩宗周康



王賜采邑于苦縣曾孫曰雲

一作曇

生崇璣崇子孫居隴西璣

子孫居趙郡崇五代孫仲翔生伯考伯考生尚尚生廣

新序晉文公反國李離為大理過殺不辜伏劍而死

郡國志趙李同卻秦兵死封其父李侯即河內平臯李城也

按史記李同名談史遷諱之同為邯鄲傳史子也

史記李信為秦將逐得燕太子丹者

史記廣成君說成安君陳餘不聽其計

高允塞上公亭詩序云代人云塞上公姓李代之李氏並其

後也

史記重泉人李必駱甲習騎兵為校尉可為騎將案漢紀桓

帝延熙三年追錄高祖功臣李必後黃門丞李遂為晉陽關

內侯

李蘭氏見官氏志

子 見世本拾遺記

左傳莊十九年王奪子禽祝跪詹父之田注三子周大夫

左傳鄭大夫子熙子丁子正又子陽為政專任刑法為鄭人

所殺

說苑齊有子奇年十八為阿邑令

國策燕大夫子之噲讓以位竹書紀年齊人禽子之醢其身
呂氏春秋宋景公之時熒惑在心公懼召子韋而問焉曰熒
惑在心何也子韋曰熒惑者天罰也心者宋之分野也禍當
于君雖然可移于宰相公曰宰相所與治國家者也而移死
焉不祥子韋曰可移于民公曰民死寡人將誰君乎宣獨死
子韋曰可移于歲公曰歲害則民饑民饑必死為人君而殺
其民以自活也其誰以我為君乎按拾遺記司星子韋宋賜
姓也

晏子春秋齊景公曰吾為夫婦獄之不正乎則泰士子牛存
矣按泰士即太士獄官也

淮南子子求行年五十有四而病偃僂脊管高于頂臆下迫
頤兩脾在上燭營指天注子求楚人燭營讀曰括撮

韓詩外傳扁鵲從魏太子病子同搗藥子明灸陽子游按摩
子儀反神子越扶形按荀勗中經簿有子儀本草經一卷鄭

康成注周禮瘍醫謂治合之齊存乎神農子儀之術賈公彥
疏云周末時人而陳騷中興館閣書目引漢書元始五年舉
天下通知方術本草者遣詣京師又樓護傳稱少誦醫經本
草方謂書名始見於此誤矣韓詩外傳扁鵲治魏太子病子

儀反神即康成所云之人也說苑作陽儀非

列仙傳子主楚語而細音不知何所人詣江都王告甯先生
負三百年直

隨書子璽開皇間為州刺史在州數年甚有恩惠後遷江陵
總管州人數千詣闕留文帝嘉嘆許之父老相賀

氏族畧宗子元瑜開封人登科

子魚氏見孔叢子此姓諸書無今補

孔叢子尹魯謂子魚子曰讀先正之書將奚以為答曰為治
世之治則助之行道世亂則獨治其身治之至也

子游氏見世本

子有氏見姓纂

氏族畧魯有子有善祥見禮記

又宗有子有恭叔亦為有氏

子夏氏見姓纂

子弓氏見風俗通

子之氏見世族譜

世族譜衛公孫彌牟文子子之氏按公孫彌牟字子之係

子南氏杜氏說非

子羽氏見姓纂

子彊氏見姓纂

子叔氏見姓譜

姓譜衛有子叔黑背魯有大夫子叔嬰齊按世族譜子叔氏黑背穆公子公孫剝子叔太子角剝子

左襄十四年傳子叔齊子為季武子介以會自是晉人輕魯幣而益敬其使注齊子叔老字也

孟子有子叔疑

子家氏見姓纂

按世族譜子家文伯歸父子莊公曾孫析子家懿伯莊公季孫子家子子家羈

說苑諸御已諫楚莊王曰陳不用子家羈而楚并之按是陳亦有子家羈也不獨魯有

淮南子齊景公一朝用三千鍾贛梁丘據子家噲導于左右故晏子之諫生焉

子服氏見世本韻譜

韓非子魯穆公問于子思曰吾聞龐糲氏之子甚不孝其行奚若子思對曰不知穆公又問子服厲伯對曰其過三皆君

之所未嘗聞自是之後君貴子思而賤子服屬伯也

按世族譜懿伯子服仲叔也仲叔蔑之子孟椒子服惠伯子

服椒子服昭伯惠伯子子服回子服景伯子服何也

子國氏見世本

子軒氏見路史

子旗氏見姓譜路史

子駒氏見潛夫論

子乘氏見姓纂

子建氏見英賢傳

英賢傳頃襄王時有子建叔子為大夫按頃襄王一作周襄

王記

子革氏見世本

子臧氏見姓譜

子車氏見姓纂

詩子車奄息子車仲行子車鍼虎

子駟氏見姓纂

姓纂鄭大夫有子駟德公見釋例辯證云釋例無子駟德公

子然氏見世本

子南氏見姓纂

世族譜子南氏公孫楚子南子游子穆公之孫

按史記注臣瓚曰汲冢古文謂衛將軍文子為子南彌牟其

後有子南固子南勁紀年云勁朝于魏後惠成王一作文王如衛

命子南嘉為侯秦并六國衛最後滅疑嘉是衛後故氏子南

而稱君也

子占氏見世本

子師氏見風俗通

左襄十年傳初子駟為田洳司氏堵氏詹氏子師子皆喪田

世本鄭有子師僕按左襄十年傳冬十月尉止司臣侯晉堵

女父子師僕帥賊以入晨攻執政於西宮之朝為子產子矯

殺

風俗通漢有北平太守子師將石按氏族畧脫石字一引作

子師磐

子禽氏見姓纂

子庭氏見姓纂

子孤氏見世族譜

世族譜鄭子孤氏有子孤孫擊孫惡

子木氏見姓解

子伯氏見世族譜

左閔二年傳熒澤之戰子伯為右

左哀十六年傳子伯季子初為孔氏臣新登於公請追之遇
載祏者殺而乘其車許公為反祏過之曰與不仁爭明無不
勝許為射之殪

氏族畧魏有子伯先子子夏門人居西河

子哲氏見姓纂

子如氏見世族譜

春秋釋例公子班子如氏班子孫叔班弟公子子駝駝子孫

知

子孔氏見世本

子人氏見世本

世本左傳鄭伯使子人九行成于晉是也按孔穎達僖二十

八年正義云桓十四年鄭伯使其弟語來盟傳稱子人來盟

杜云即弟語也

子士氏見世本

子淵氏見世本

左昭二十六年傳師及齊師戰于炊鼻齊子淵捷從洩聲子射之中楯瓦繇胸汰輶已入者三寸聲子射其馬斬鞅殪改駕人以為馮戾也而助之子車曰齊人也將擊子車子車射之殪注子車即淵捷按淮南子說山訓陳成子恒之劫子淵捷也注陳成子將殺齊簡公使勇士十六人脅其大夫子淵捷欲與分國捷不從故劫之

子罕氏見世本

子蕩氏見世本

子午氏見世本

世本齊有大夫子午明

子俛氏見英賢傳

英賢傳子俛子齊人著書五篇論兵法與穰苴同按漢執文志雜家有子晚子三十五篇齊人好議兵與司馬法相似賈執作子俛疑誤宜作子晚也

子尚氏見世本

國語鄭大夫子尚伯父世本引之

子儀氏見世族譜

左哀十七年傳桓司馬向魍之臣曰子儀克子儀克適宗告

皇瑗之子麋于夫人曰麋將納桓氏

子西氏見世本

子寤氏見世本

子仲氏見風俗通

詩陳風宛丘云子仲之子婆娑其下

子郢氏見世本

子石氏見世本

按說苑子貢問子石子不學詩乎石子曰吾暇乎哉父母求
吾孝兄弟求吾悌朋友求吾信吾有暇乎哉子貢曰請投吾

學以學于子

子輿氏見氏族畧

子穆氏見世本

子高氏見姓纂路史

昭二十年傳齊豹之亂北宮喜滅齊氏公入于玉霄子高魴
出奔晉注齊氏黨按亦見世族譜

子文氏見路史

子韓氏見世本

左昭公十三年傳南蒯奔齊侍飲酒于景公公曰叛夫對曰

臣欲張公室也子韓哲曰家臣而欲張公室罪莫大焉
子期氏見左注

左定四年傳鑪金初官于子期氏按韓詩外傳賈誼新書作
子綦呂覽注子旗越絕書作子其

子庚氏見姓纂

子囊氏見世本

子功氏見路史

子公氏見世本

子沮氏見世本

子剡氏見路史

子牽氏見路史

子襄氏見世本

子旅氏見左傳

子翬氏見路史

子干氏見路史

子季氏見世本

子成氏見世本

子扁氏見姓纂

子行氏見釋例

廣韻衛有子行敬子按世族譜衛雜人有子行敬子左定三年劉文公合諸侯于召陵謀伐楚也晉假羽旄于鄭明日旆以會晉于是失諸侯將會衛子行敬子言于靈公曰會同難噴有煩言莫之治也其使祝佗從

子濯氏見廣韻

廣韻鄭有子濯孺子

子獻氏見風俗通

風俗通楚文王大夫子獻遼

子玉氏見釋例路史

姓譜秦穆公大夫子玉房衛有子玉霄按左昭二十年傳公入子玉霄子高魴奔晉注齊豹黨也亦見世族譜

子奢氏見路史

子桑氏見成牟英疏

莊子孔子問子桑雎曰吾再逐于魯伐樹于宋削跡于衛窮于商周圍于陳蔡之間吾犯此數患親友益疎徒友益散何與子桑雎曰子獨不聞假人之亡與林回棄千金之璧負赤子而趨或曰為其布與赤子之布寡矣為其累與赤子之

累多矣棄千金之璧負赤子而趨何也林回曰彼以利合此
以天屬也

子州氏見莊子疏

莊子堯讓天下于子州支父舜讓天下于子州支伯皆曰我
適有幽憂之病方且治之未暇治天下也

子楊氏見世本

世本云左傳楚子楊窻按子楊窻一作子陽蔥姓纂引子楊
作手不從木

子楊氏此姓諸書無今補

左文十六年傳楚使廬戢黎侵庸庸人逐之囚子揚蔥注子
揚蔥戰黎官屬澍按世本引左傳作子楊窻一作子陽蔥

子陽氏見世本

史記鄭子陽為政專任刑法國人因逐獬狗之亂而殺之按
不止曾有子陽也然鄭之子陽為駟氏見韓非子

史記秦越人治號太子病使弟子子陽厲鍼砥石以取外三
陽

子鉏氏此姓諸書無今補

左傳魯有子鉏商為叔孫之車士

子言氏見世本潛夫論

定四年陽虎之亂子言辨舍爵于季氏之廟而出按子言季

子齊氏見氏旅畧

子寬氏見路史

子豐氏見世本

子雅氏見世本

子尾氏見世本

子華氏見姓源

子鞅氏見世本

子芒氏見世本

子宗氏見世本

子重氏見氏族畧

子枋氏見姓苑姓纂

子孟氏見英賢傳

英賢傳齊簡王大夫子孟卿按姓纂王作公

子我氏見英賢傳

英賢傳衛有大夫子我封人按姓纂封人一作羽人訛

子履氏見路史

士 見世族譜

呂氏春秋陰康氏時恒風振蕩羣陰闕遏陽氣不伸果木難實朱襄命臣士達作五絃之瑟象五行鼓之以來陰氣以定羣生

按晉士為生司空穀為孫會字季為太傅謚曰武子生文子變佐上軍其子魴佐下軍變生宣子句佐中軍句生獻子鞅為公族大夫鞅生昭子吉射及皋夸魴字季食邑于彘曰彘季謚恭生彘裘其子孫居隨及范故又為隨氏范氏其族有士富為候奄士會別族也國語注文子族昆弟士渥濁即士

伯穆子之子貞子也為太傅子弱為晉主獄大夫謚莊子士句字伯瑕弱之子為大夫事平公謚文伯子彌牟為理官事昭公謚景伯又有士鮒奔周意為魴之弟士茁荀瑶之家臣秦之士雅為景公乞師于楚伐晉衛之士榮為大士被刑宗之士平與華亥向寧等奔楚皆其族也楚有士亶莊王使亶傅太子蒧見國語楚有陰地之命大夫士蔑杜注命大夫別縣監尹見哀四年傳

新序雜事篇士慶以進言莊王用為令尹

國策呂不韋曰五年高矣王居無子僕有承國之業士倉又

輔之王一日山陵子孫立士倉用事王后之門必生蓬蒿
又齊貌辯之為人多疵門人弗說士尉以証靖郭君不聽士
尉辭而去注士尉齊人証諫也

吳志士燮字彥威廣信人治左氏春秋建安中舉茂才遷交
阯太守弟壹為司徒掾黃琬甚器重之燮表壹領合浦太守
壹弟黼為九真太守武為南海太守兄弟並為列郡震服百
蠻尉佗不足喻也燮子歆事吳為武昌太守燮眈春秋為之
注解素徽與荀彧書曰士府君學問優博又達于從政澍按隨
書高構傳河內士燮為刑部執法平允是有二士燮也

晉書太子遹既廢眾情憤怒右衛督司馬雅常從督許超與
殿中丞士猗等謀廢賈后士猗為趙王倫之黨

氏族畧南北朝有徐聞令士顯功曹士瞻

唐郎官石柱題名有度支郎中士義惣

氏族畧宋尚書郎士建中

陝西志士明善字復初清河人永樂初鄉舉事母孝與弟相友

愛好學不倦官西安府通判

士思氏見廣韻

姓纂晉有士思癸見古今人表鄭有士思卜秦將軍士思穆

按宋重修廣韻士字注引人表有士思癸今人表無之

士貞氏見辯證

士弱氏見姓纂

左傳衛侯入晉晉人執而囚之于士弱氏注士弱晉主獄大夫也

士季氏見英賢傳春秋分記

士丐氏見姓纂

士成氏見莊子疏

莊子士成綺見老子而問曰吾聞夫子聖人也吾固不辭遠

道而來見百舍重趺而不敢息今觀吾子非聖人也鼠壤者

有餘蔬而棄妹不仁也生熟不盡于前而積斂無崖

士孫氏見左杜注漢書

儒林傳平陵人博士士孫張字仲方明梁丘易為揚州牧張生長安令仲徹孫睦為弘農太守按冊府元龜士孫張官至給事中睦一作睦姓纂徹為長安令左馮翊生苞苞生充曾孫奮為郡五官掾六代孫睦後漢弘農太守生瑞尚書令瑞生萌字文始議郎封澹津侯生賢穎

王莽傳太傅犧叔士孫喜請潔江湖之盜賊而匈奴寇邊甚

莽乃大募天下丁男及死罪囚吏民名猪突豨勇以為銳卒
三輔決錄扶風富人孫奮字景卿梁冀遺以鏤鞶從貸五
千萬奮以三千萬與之冀大怒收奮考死少為郡五官掾董
卓時士孫瑞字君策一作榮睦子也與王允共謀誅董卓被殺
瑞子萌字文始有才學封澹津亭侯王粲與為友贈之詩
魏書江悅之傳武功太守士孫天與扶風人以勲封莫西縣
男食邑二百戶

士彊氏見路史

士尹氏見高誘注

呂氏春秋士尹池為荆使于宋司城子罕觴之御覽引作工

尹佗

士吉氏見世本

士為氏見氏族畧

豕

豕韋氏見世本路史

按左傳言孔甲以劉綰更豕韋後而國語乃云大彭豕韋為
商伯又云彭祖豕韋則商滅之則二國至商方盛豈劉綰遷
魯之後而二國更復乎然襄二十四年范宣子言其祖云在

商為豕韋氏豈復封乎不然何兩立也

杞
見釋例

左襄二十三年傳齊侯襲莒杞植華還載甲夜入且于之隧宿于莒郊明日過莒子于蒲侯氏重賂之使無死不從莒子親鼓之獲杞梁齊侯歸遇莒梁之妻于郊齊侯使弔之辭曰有先人之敝廬在妾不得與郊弔按琴操云杞殖殖梁字也

杞梁妹名明月

左傳秦有杞子戍鄭

姓源漢杞康為中大夫避董卓難改姓抱一云改姓杞

按後魏書宦者抱嶷傳云嶷終于涇州刺史自言其先姓杞後避禍改焉而後魏化政寺石窟銘題涇州刺史杞嶷造當是後改本姓耳

又文成文明皇后馮氏聽政杞道德等拔自微闕歲中而至王公

後周書有杞秀為湘州刺史以狼狽得罪按一作杞秀又鄭偉專戮江陵副防主主杞賓王

氏族畧宋有杞開奉義人建炎中以朝散郎任蕪湖令

珥
此姓諸書無今補

軹 此姓諸書無今補

博古圖有軹家釜軹家甑是軹為姓也

弭 見姓苑

漢書更始持節將軍中郎將弭彊新豐人為鄧禹殺

三輔決錄有弭升仲叔弭倬俱新豐人仲叔少有重名其父

賤張伯英與李幼才書曰弭仲叔高德美名命之才也非弭

氏小族所當有新豐瘠土所當出也

劉寬碑陰門生名有杜陵弭缺季子

五代史後周有弭德超滄州清池人初補供奉官遷酒坊使

歷杭州兵馬鎮州驛漕都監踰時不遷耻居同官柴禹錫下

怏怏不樂語多怨望云上無執守為汝輩眩惑王顯密以其

語告上上怒使滕中正就第鞠問詔奪官職並家口配瓊州

以死

氏族畧宋有弭忠信咸平間知安遠縣事

元史弭禮燕山人大德中以朝列大夫起家拜開封府尹愛

恤百姓約束吏卒

馬祖常文集元明善之母弭氏追封清河郡夫人

山東志弭廣歷城人成化中任休寧縣丞

漂水縣志弭官唐縣人嘉靖中任漂水縣丞

通州志弭子立山東貢生萬歷時為北通州訓導

跪 見路史

肺 此姓諸書無今補

魏書劉眷討蠕蠕別帥肺渥于意親山 破之

兕

兕先氏此姓諸書無今補

北史兕先氏許嫁彭老生為妻聘幣既畢未及成禮居貧春
汲以養父母老生輒往逼之不肯從老生怒殺之取其衣服

女尚能言臨死謂老生曰生身何辜與君相遇若靈魂有知
自當相報言終而絕老生為叔執送于官太和七年有司劾
以死辜詔曰老生不仁侵凌貞淑原其強暴便可戮之而女
守禮履節沒身不改雖處草莽行合古跡宜賜美名以顯風
操其標墓旌善號曰貞女

靡 見姓苑

漢書趙充國傳罕开豪靡忘靡當兒桎荀悅漢紀罕开豪靡
忘使人來言願得故地充國以聞未報靡忘自來歸充國充
國以聞賜靡忘飲食遣還

靡父氏見姓纂

姓纂漢有靡父樂陽靡父中孺按集古印譜作靡夫樂陽

指 見盧若虛刻石記此姓諸書無今補

漢 見姓苑

祿 海篇祿音你人姓

矣 雲南志夸姓也此姓諸書無今補

唐書先是有時傍矣川羅識二族時傍入居遼川州為閭羅
鳳徙置白崖城後與矣川羅識詣神川都督求自立為詔謀
洩被殺矣川羅識奔神川都督送之羅些城

揣 唐韻集韻並楚委切音椽

統譜明永樂舉人揣本泌陽人

姓韻卷五十一

五尾

武威張澍纂

尾 見姓苑路史

後漢書劉虞故吏尾敦虞為公孫瓚殺敦劫虞首歸葬之

氏姓譜曹縣人尾禮弘治中任臨城縣主簿

尾生氏見高誘註

按東方朔曰信如尾生高誘注國策淮南子注並云尾生魯人也氏族畧云魯武城人莊子云尾生與女子期於梁下女

子不來水至不去抱梁柱而死淮南子云期于藍橋下此尾
生即微生也蘇代謂燕昭王曰尾生高不過不欺人耳吳師
道亦謂即論語微生高也論語微生高微生畝古今人表作
微可微鄧名世以尾微為二姓誤矣管子云尾生高犀角
三峽記明月峽中有二溪東西流宋順帝昇平二年溪人微
生亮釣得一白魚長三尺投置船中以草覆之及歸取烹見
一美女在草下潔白端麗年可十六七自言高唐之女偶化
為游魚為君所得亮問曰既為人能為妻否女曰冥契使然
何為不得為亮妻三年忽曰數已足矣請歸高唐亮曰何時

復來答曰情不可忘者有思復至其後一歲三四往來不知
所終

尾勺氏見左傳

鬼 見史記注

郊祀志黃帝得寶鼎冕侯問于鬼史區注黃帝臣一作鬼容
區

趙策鬼侯鄂侯文王紂之三公也鬼侯有子而好故入之于
紂紂以為惡醢鬼侯鄂侯爭之急辯之疾故脯鄂侯

宋濂集元曲靖宣慰使鬼宗亦蠻酋助兵一萬禽伯胡幕府

上功擢鬼宗參知政事

明石亨傳彪與彰武伯陽信等禦之連戰皆捷斬鬼力赤追
出塞轉戰六千餘里

鬼方氏見世本

世本陸終娶鬼方氏女嬪生六子按易高宗伐鬼方即此
鬼駝氏見路史

斐

弇山堂別集斐俊丹棧人官御史斐旻樂安人官僉事

辰

見姓苑

氏姓譜辰昭永樂中以御史調崑山令辰繡永樂舉人辰錦
正統舉人均解州人

偉

見姓苑

蔡邕傳光祿勳偉璋有名貪濁

後魏書偉肫字尊顯少有志業年十八辟州主簿時屬歲儉
肫以家粟造粥以飼飢人所活衆

宋濂集閩酋偉柱弑父自立楊祭討之

六語

園

見辨證

哀十六年傳白公勝以王如高府石乞尹門圍公陽穴宮負
王以如昭夫人之宮

印藪漢有園良卿按集古印譜作園長卿
園人氏見氏族畧

語 見路史

呂 見國語注世系表

世系表齊康公七世孫禮秦昭襄王十九年自齊奔秦為柱
國少宰北平侯二子伯昌仲景伯昌生青以令尹從漢高祖
封信陽侯謚曰胡唐有許州刺史仁宗即其後也康公未失

國時子孫先已散處韓魏齊魯之間其後又徙東平壽張魏
有徐州刺史萬年亭侯虔字子路孫行鈞其後居河東

左傳晉有呂錡射楚共王中目又成十一年晉使呂相絕秦
注相魏錡子

國策周相呂倉齊相呂禮魏有呂遼又作呂遺秦相有呂不
韋楚有呂臣

漢書高祖后父呂公單父人按漢舊儀云呂公汝南新蔡人
相經云魏人名文字叔平也

漢書呂歐為中涓從高祖攻項羽封廣侯子勝勝子嘉又呂

公子澤釋之釋之子台呂清二子世子義義子色色子善
漢書呂蓋字君玉宛陵人和帝時由光祿為司徒

又安帝時遣光祿大夫樊準呂倉分行冀兗二州稟貸流民
又呂強字漢盛成皋人以宦者為小黃門遷中常侍為人清
忠奉公勸靈帝赦黨人

續漢書呂母子名育為游徼犯罪令殺之

蜀志呂乂字季陽南陽人為縣竹令隱恤百姓為蜀郡守禁
防開喻隱漏自出為尚書令門無宿賓

又呂凱字季平不韋人任永昌郡功曹威惠內著為郡中所

信故能全其節諸葛亮以凱為雲南太守

呂管氏見姓纂

姓纂漢有鉅鹿都尉呂管次祖中山人

呂相氏見姓纂

侶
此姓諸書無今補

鄆州志侶鶚山東鄆城人萬曆十年任州吏目

旅
見風俗通

功臣表昌圍侯旅卿以齊將漢王四年從韓信起無鹽定齊
擊項羽又擊韓王信于代侯千戶孝文十五年侯通嗣孝景

三年坐謀反誅子賜代死無子絕有同產子元始二年求不得元康四年卿玄孫昌上造光詔賜黃金十斤復家
功臣表共嚴侯旅罷師以齊將漢王四年從淮陰侯起擊項籍又擊韓王信于平城有功侯千二百戶孝文七年惠侯黨嗣十五年懷侯高嗣元康四年罷師曾孫霸陵簪裊信詔復家按高史記作商

按元有旅之望與丁鶴年宣光綸入明不屈節而死

汝 汝一作女古字通

左襄二十六年傳晉人執北宮遺甯喜使女齊以先歸按女

齊即司馬侯亦曰司馬女叔侯晉侯使司馬女叔侯來治杞田弗盡歸也悼夫人愠之昭二十六年傳晉使女寬守闕塞

按寬字叔褒叔齊子定元年城成周之役女叔寬曰萇弘違

天高張違人

漢書馮異傳賊汝章據槐里自稱將軍又有汝敦槐里人按蜀亦有汝敦也

賈逵傳陳國汝郁字叔異性仁孝親沒遂隱處山澤後累遷為魯相以德教化百姓稱之流人歸八九千戶按東觀記郁年五歲母病不能食郁常把持啼泣亦不食母憐之強為飯

宗親共異之因字曰異也

英賢傳汝隨為長水校尉

隸釋建初三年有汝伯寧甄文

王莽傳大姓櫟陽申碭下邳王大皆率眾隨憲屬縣嚴嚴春
茂陵董喜藍田王孟槐里汝臣蓋屋王扶陽陵嚴本杜陵屠
門少之屬眾皆數千人假號稱漢將

又廉丹使吏持其印鞞符節付匡曰小兒可走吾不可遂止
戰死校尉汝雲王隆等二十餘人別鬪聞之皆曰廉公已死
吾誰為生馳奔賊皆戰死

華陽國志汝敦兄弟共居有父母時財物嫂心欲得之敦妻
勸盡讓田宅奴婢于兄弟出別居敦後得金器妻勸送與兄
王隱蜀記劉禪遣汝超受鄧艾節度

集古印譜漢有汝猷汝驥汝充

杜茂傳巴蜀流人汝班蹇碩

宋史汝顏安岳人舉進士調鳳州幕職年未及請致仕仁宗
嘆其早退授太子舍人

四川志汝為建炎中陳邊事假開州刺史使金致書劉豫
誘以官固辭後亡歸獻恢復方畧秦檜欲械送金人乃滅姓

名入蜀著有忠嘉集

又普州汝孝恭登嘉祐八年癸丑^科進士弟孝隆同科汝日休
政和五年乙未科汝宣建炎二年戊申科汝修乾道五年己
丑科汝侑乾道八年壬辰科汝秉文寶祐元年癸丑科並普
州人

氏族譜明景泰舉人汝楫吳江人官同知汝泰弘治丙辰進
士官知府汝訥由舉人弘治中授中書舍人歷官南兵部郎
中出知南安府政尚簡易汝齊賢嘉靖進士汝慶妻屈氏有
詩才及卒女韓異悲母集散失以書貽康對山乞序

女

按女與汝同茲則男女之女與爾汝之汝不同見陸賈新語
世本

定十四年傳使女艾謀澆按楚辭注夏少康臣女艾

書序商有女鳩女方按方一作房

楚辭天問篇女岐縫裳而館同爰止

莊公二十五年陳侯使女叔來聘杜注女氏也成公十二年
年麻隧之戰夏獲秦不更女父注不更秦爵

左昭公二十四年傳齊侯將納公命無受魯貨申豐從女賈
以幣錦二兩縛以如瑱適齊師注豐賈二人季氏家臣

莊子女媯古之懷道人

又徐無鬼因女商見魏武侯武侯勞之曰先生病矣苦于山林之勞故乃肯見于寡人徐無鬼曰我則勞于君君何有勞于我

公羊傳有女子

楚策女阿謂蘇子曰秦栖楚王危太子者公也今楚王歸太子南公必危

綏寇紀畧盧氏人女陬降李自成為謀議

處
見風俗通

史記處子趙人辯士也著書九篇註七十子之後按荀卿傳云劇子之言徐廣曰案應劭氏姓注直云處子也

漢書李章傳處興為太守時為安丘大姓夏長思所囚李章攻誅長思興歸郡按風俗通漢有北海太守處興林寶作北郡太守記

晉書齊王冏謀討趙王倫未發會離石王盛穎川處穆聚眾于濁澤百姓從之日以萬數為倫將管襲殺之

又處就為陳留王相穎川人周馥母處氏汜國人
後魏書處德義沛人

處師氏諸書無此氏今補

韓詩外傳巫馬施與子路薪于韞丘之下陳之富人處師氏者指車百乘觴于韞丘之上

褚 見漢書注

史記曰者傳滎陽褚氏以相牛立名

漢書梁相褚大元成間有褚先生名少孫並以儒學稱一云大即少孫也史記孝慈紀注韋稜曰褚顛家傳云少孫宣帝時為博士事大儒王式號為先生續太史公書

吳書褚瑤字孔琨為烏傷令罷單船而故人太子中庶子羊

道乞土宜瑤乃抽船上竹一竿與之曰東南之美惟竹箭最貞而有節幸堪歲寒羊道密令人視之舟惟竹笠一枚蘆席數領遂起用瑤昭信中郎

唐世系表少孫裔孫重始居陽翟孫昭安東將軍揚州都督關內侯孫碧字武良晉安東將軍徙丹陽五子願說洽裕祥洽武昌太守征討大都督都鄉元穆侯哀字季野二子歆熙歆字幼安秘書監生爽字義宏會稽王咨議參軍爽五子秀之粹之陟之裕之浚之秀之字長倩宗太常四子攜之湛之貞之法顯

按金石錄唐書褚亮錢塘人而碑云晉南遷家于丹陽元和
姓纂自有錢塘褚氏與亮不同唐史蓋失之攷錢塘褚氏之
見于史傳者晉則有褚陶齊則有褚伯玉梁則有褚修皆不
與亮同系然亮與遂良舊宅實在錢塘見咸淳臨安志
褚師氏見左杜注

按衛大夫褚師圃褚師比褚師定子褚師聲子褚師子
申見昭二十年與哀十五年傳子石即褚師段見左襄二十
年傳宋又有褚師子肥見哀八年傳

鼠

鼠尼施氏此姓諸書無今補

唐書突厥三姓有鼠尼施氏高宗時以鼠尼施處半部為鷹
娑都督府又颶海道大總管蘇海政收彌射等斬之其部鼠
尼施拔塞幹叛走海政進平之

唐書阿思那彌射之母鼠尼施氏

許 見世系表

莊子成子英疏許由死後堯封其墓謚曰箕公即堯之師也
按帝王世紀許由字武仲陽城槐里人高士傳堯就其墓號
曰箕山公神配食五岳金樓子父名耳由又字道開長八尺

九寸

左哀九年傳鄭許瑕武子騰之嬖求邑無以與之宣十二年
邲之戰許伯御樂伯以致晉師曰吾聞致師者御旌靡壘而
還又許偃御右廣養由基為右哀十六年傳許公為射子伯
季子殪

呂氏春秋許犯學于禽滑釐

國策韓哀侯相許異又趙奢軍士許歷關與之戰施謀敗秦
按王粲詩所云許歷為完士一言猶敗秦是也

說苑魏有許綰諫起中天之臺者

班固西都賦許少施巧注

姓纂秦末有許猗隱居不仕

史記漢有善相許負按郭解是許負之外孫

水經注柘縣內有柘令許君清德頌城西南里許有漢陽臺
令許叔種碑光和中立又有漢故樂成陵令太尉掾許嬰碑
嬰字虞卿司隸校尉之子建寧元年立

漢書許商以周堪受尚書著五行^論疏其門人林子高為德行
吳章為言語王吉為政事炆幼卿為文章

又許曼平輿人祖父峻^字季山善卜占著易林傳于世曼少傳

峻學隴西太守馮緄始拜開綬笥有兩赤蛇分南北曼筮之
又許楊平與人少好術數王莽輔政召為郎遷酒泉都尉莽
篡位楊乃變姓名為巫醫逃匿他界莽敗乃還鄉里建武中
太守鄧晨以楊曉水脉署為都水掾因高下形勢起塘四百
餘里百姓得便豪右共譖楊受賄晨收楊下獄械輒自解脫
即夜出之

漢書許敬字鴻卿平與人順帝時由光祿勳為司徒按應劭
漢官儀載崔瑗表云許敬年且百歲猶居相位東觀記云為
陵轢使者策罷二千石祿終身

又許栩字季闕偃人桓帝世由衛尉為司徒

又許訓靈帝世自太常為司徒訓字季師司空敬之字許相
字公弼訓之子靈帝世由光祿大夫為司空

又許慎字叔重召陵萬歲里人博學經籍時人語曰五經無
雙許叔重撰五經異義又作說文解字為涑長太尉東閣祭
酒

又許荆字少張陽羨人以二弟晏普未顯欲令成名乃自取
肥田廣宅奴婢強者後皆讓弟兄子世殺人荆跪自咎怨家
委去官桂陽太守耒陽縣人蔣均兄弟爭財荆上書陳狀乞

詣廷尉均兄弟感悔荆孫馘靈帝時由衛尉為太尉按漢官儀馘字季軼

鄒 見路史

巨 見路史

水經注引開山圖云有巨靈胡者徧得坤元之能造山川出江河

韓非子齊宣王問巨倩曰儒者鼓瑟乎對曰不也瑟也乃以大絃為小聲以大絃為小聲是細大易序貴賤易位儒者為害義故不能按一作匡倩

廣韻漢有巨武為荊州刺史

漢書順帝時漢陽人巨覽梁商辟為掾屬與李固齊名亦見鄧騭傳

北齊書巨尉性友

十六國春秋苻堅將郭慶部將巨武縛慕容暉見前秦錄按此有二巨武也

金石錄唐宣德郎前晉州司法參軍巨雅書李輔光碑

唐書歸崇敬傳時有方士巨彭祖建言唐家土德請以四季月郊祀天地詔禮官儒者雜議

宋史巨師古高宗時為統制討戚方三戰三勝

金史巨構字子成平谷人第進士累遷橫海軍節度使寬厚廉慎寡言所治以鎮靜稱性尤恬退

陝西志巨淵蒲城人洪武中官四川僉事

昌黎志巨禮昌黎人洪武中官太僕寺丞

甘肅志巨敬靈臺人初為御史伉直敢言建文中擢戶部主事充史館清慎有聲靖難兵起與陳迪同被逮責問不屈死之滅其族後謚節愍

陝西志巨泰藍田人正統中任鎮江判官

甘肅志巨有德張掖人雍正間任中衛副將

巨母氏此姓諸書無今補

王莽傳夙夜連率韓博上言有奇士長丈大十圍來至臣府曰欲奮擊胡虜自謂巨母霸出于蓬萊東南五城西北昭如海瀕輜車不能載三馬不能勝即日以大車四馬建虎旗載霸詣闕霸臥則枕鼓以鐵箸食此皇天所以輔新室也願陛下作太甲高車賁育之衣遣大將一人與虎賁百人迎之于道京師門戶不容者開高大之以視百蠻鎮安天下博意欲以風莽莽惡聞之留霸在所新豐更其姓曰巨母氏謂因文

母太后而霸王符也徵博下獄以非所宜言弃市師古曰莽
字巨君若言文母出此人使我致霸焉

巨辰經氏見潛夫論

所見風俗通

穀梁傳隱九俠卒俠者所俠也范甯注俠名也所其氏

風俗通漢有諫議大夫所忠按食貨志所忠言世家子弟富
人或鬪雞走狗弋獵博戲亂齊民服虔云掌故官取書于司
馬相如封禪言公孫卿因所忠言寶鼎是也又見司馬相如
傳姚察以為所患非也

漢書安帝永初二年劇賊畢亮等寇平原縣令劉雄將吏士
追之至厭次津為賊所執門下小吏所輔求代雄死賊縱雄
殺輔東郡太守以狀上詔書追傷之除父奉為郎輔平原人
集仙傳有所清絳州傳置卒也

統譜成化間千戶所銘

所夫氏

唐書高麗大酋所夫孫為薛萬徹所斬虜皆震恐按舊書薛
萬徹傳至泊灼城高麗震懼多棄城而走泊灼城主所夫孫
率步騎萬餘人拒戰萬徹于陣斬所夫孫

楚 見姓纂

左哀二十年越圍吳趙孟降于喪食楚隆曰三年之喪親暱之極也主又降之無乃有故乎趙孟黃池之役先主與吳王有質楚隆曰若使吳王知之可乎乃往先造于越軍而後告于吳王

姓纂古有賢者楚老

五代史後晉帝欲殺楚匡祚韓昭胤曰陛下為天下父天下之人皆陛下之子用法宜存至公匡祚受詔檢校重吉家財不得不爾今族匡祚無益死者恐不厭衆心乃長流于登州

宋史楚昭輔字拱辰宋城人陳橋之變太祖憂母杜氏在城中遣昭輔慰安家人受禪擢軍器庫使討澤潞征淮陽並以為京城巡檢使建隆四年權知揚州命鈞校左藏金帛帝能其心計拜左騎衛大將軍權判三司太宗即位拜樞密使卒贈侍中無子錄兄子吉供奉官敏殿直昭輔為人勤介人不敢于私吉子隨敏子咸並進士及第隨為太常博士咸屯田員外郎按一引昭輔作公輔者非

宋史楚衍阡城人少通四聲字母里人柳曜師之長子九章緝古綴術海島諸筭經尤得其妙兼明相法及聿斯經善

^推步陰陽星歷之術閒語休咎無不中自陳試宣明歷補司天監學生遷保章正天聖初造新歷授靈臺郎與歷官宋行古等九人製崇天歷成進本監丞入隸翰林天文又同造司辰星歷十二卷無子有女亦善算術

宋史楚建中字正叔洛陽人舉進士知滎河縣民苦鹽稅不^平建中約田多寡以為輕重趙元昊歸款建中疑之白府請築安定黑水八堡以控東道夏人果來侵聞有備不敢入累遷陝西轉運使知慶州江寧成德軍以正議大夫致仕

元史楚芝蘭襄城人初習三禮遇有道之士教以符天六壬遁甲之術上書自薦錄為學生以占候有據擢為翰林天文授樂源縣主簿遷春官正判司天監事請建五福太乙宮于京師蘇村

楚季氏見世本

世本陳有大夫楚季融

楚丘氏見姓譜

左閔公二年傳成季將生桓公使楚丘之父卜之昭公元年傳穆子之生莊叔以周易筮之遇明夷之謙以示卜楚丘曰是將行

新序楚丘先生行年七十披裘帶索往見孟嘗君趨而不能
進孟嘗君曰先生老矣春秋高矣何以教之楚丘先生曰將
我追車而赴馬乎投石而超距乎逐麋鹿而縛虎豹乎吾已
死矣何暇老乎將使我出正辭而當諸侯乎決嫌疑而定猶
豫乎吾始壯矣何老之有

楚且氏見路史

楚宗氏見路史

莒 見世本廣韻

左傳莒僕莒展莒慶楚大夫有莒伯

襄二十二年^傳申驅成秩御莒恒申鮮虞之傳摯為右

東觀漢記緱氏令莒誦其後為昌平太守按一作莒調

莒子氏見英賢傳

舉 見姓苑路史

國語左史倚相廷見申公子亶子亶不出左史謗之舉伯以
告韋注舉伯楚大夫也

唐書韋皋傳吐蕃大將軍舉落降

序 見路史

禮記孔子射于矍相之圃序點揚解

英賢傳後漢有序淵

緒 見姓苑韻會

北齊書陽平路叔文徒黨緒顯等立營柵為亂高季式討平之

統譜緒珊明永樂成都舉人緒紀馬平人弘治舉人緒東山亦馬平舉人嘉靖間任高安縣知縣

杼 見集韻

敘 見姓苑路史

組 見路史

列仙傳組伯子者冬著單衣盛夏著袴襦

姐 見姓譜

金史交聘世宗十三年宋宣州觀察使姐士榮賀萬春節

正字通明宣德中五臺知縣姐有用慶都人

丹徒縣志姐迪丹徒人官訓導姐高字化升官崇府教授

磁州志姐琚字佩章磁州進士正德中員外郎何孟春傳吏

部主事姐琚諫大禮哭左順門

甘肅志姐衍泰禮縣訓導

題名錄姐如蘭山東武定州人崇禎庚辰進士姐如蕙武定

州人順治辛丑進士

管

古今印數漢有管光

匣

海篇匣音語姓也

燈

集韻燈子呂切音咀海篇直音姓也

咀

見姓苑

柰

與柰同此姓諸書無今補

三尊譜錄太上真君法姓柰

姪

見辯證按此非姓宜刪

旅

按音義同旅海篇姓也又按海篇作旅非也宜依廣韻作旅

鉅

見路史

呂氏春秋有鉅子腹蘄高誘注淮南子云蘄與贛同

沮

見路史

幘

玉篇力字切古姓也諸書無此氏今補

姓韻卷五十二

上聲

七麋上

成威張

澍篔

羽

見急就篇

游俠傳東道趙他羽公子索隱曰舊解以趙佗與羽公子為二人

漢曹參傳參擊羽嬰于昆陽追至葉還攻成強

北海相景君銘碑陰有書佐都昌羽質孟傲中部督鄆都昌羽忠定公

氏族畧宋嘉祐進士羽儀官朝散郎

氏姓謚明成化舉人羽闕福電白人

羽真氏見北史

羽弗氏見官氏志

栩 見陳留先賢傳

漢書董賢傳哀帝策免丁明詔曰將軍從弟侍中奉車都尉吳叔父左曹屯騎校尉宣皆知伍宏及栩丹諸侯王后親而宣除用丹為御屠

禹 見風俗通廣韻

漢泰山都尉孔宙碑陰故史泰山南城禹規字世舉

馬鳴生別傳鳴生隨神女禹章入石室彈琴有一弦五音並奏

王僧孺百家謚蘭陵蕭道游娶禹氏女

東魏李仲璇修孔子廟碑有征虜將軍城局參軍禹太安吳越備史南唐知常州軍州事禹萬誠按馬令南唐書常州軍使余成禮劫刺史禹萬誠以降

金史禹顯雁門人貞祐初隸上黨公張開屢戰有功授義勝軍節度使戰玉女寨大獲權元帥府都監後以軍變被

害

李源道文謝枋得之弟子禹莫若

元史禹蘇福至正十一年為本路總管紅巾賊起福督兵討之斬獲萬餘民賴以安

四川志禹祥臨洮人成化舉人任仁壽知縣治民事神處已待物惟以不欺居官清約如寒士按甘肅志禹祥字廷正臨洮人成化丁酉亞魁任劍州知州呂涇野稱其公直而廉兄克勤又禹宗元任榆社訓導禹績疇之弟禹範蓬州學正禹大周襄陽教授皆狄道人也按禹之裡亦臨洮人官仁壽令見弇山堂別集

河南志禹凱西華人成化舉人長垣教諭

蘭州府志禹第三萬麻中任蘭州府判官三河人

大足縣志訓導禹節不詳其籍在嘉靖時任

銅梁志禹謨荆南人嘉靖間任銅梁縣知縣

河南志禹好善字存誠汜水人天啟壬戌進士授監察御史章奏屢上悉蒙嘉納按山東墨吏望風解綬去致仕後講學以濂洛關閩為宗

題名錄禹昌際順治丙戌進士禹壽乾隆丁丑進士禹文

煦乾隆癸未進士均汜水縣人

萬 見顏師古八表注急就篇

漢書游俠傳萬章字子夏長安人長安熾盛街閭各有豪俠章在城西柳市號曰城西萬子夏為京兆尹門下督從至殿中侍中諸侯貴人爭欲揖章莫與京兆尹言者章遂循甚懼其後京兆不復從也與中書令石顯相善亦得顯權力門車常接轂至成帝初石顯坐專權擅執免官徙歸故郡顯貲鉅萬當去留床席器物數百萬直欲以與章章不受賓客問其故章嘆曰吾以布衣見哀於石君石君家

破不能有以安也而受其財物此為石氏之禍萬氏反當以為福耶諸公以是服而稱之河平中王尊為京兆尹擊捕豪俠殺章及箭張回酒市趙君都賈子光皆長安名豪報仇怨養刺客者也

禍 見集韻按姓苑有禍無禍此宜刪

禍 見詩鄭箋

古今人表周師氏禍按詩禍為師氏鄭箋禍褒氏族黨急就章有禍改卿按一作禍段卿顏師古注此擬換之名

郵 見世本

字 見姓苑路史

氏姓謚字燦江寧人正統舉人字英汝縣人成化中任常熟縣丞字賓萊陽人正德中官大名府通判字智宏行唐人正德中官沁陽訓導

宇文氏見周書

周書普回子莫那自陰山徙居遼西至後周追謚曰獻侯生可地汗號莫何單于闕地西出玉門東踰遼水孫晉撥一作撥生丘不勤丘不勤生莫珪莫珪生遜昵延遜昵延生逸豆歸自稱大單于為慕容皝所滅生六子一曰拔拔陵

陵二曰拔拔瓌三曰紇闡四月日原五曰紇闡侯直六曰目陳拔拔陵陵號阿若考仕後魏都牧主開府儀同三司安定忠侯以豪傑徙居代州武川生系位至內阿十二子韜阿頭韜三子肱顥泰泰後周太祖文皇帝阿頭生仲贈大司徒虞公生洛日原孫拔後魏羽真尚書居庸侯生直力勒比部尚書直力勒生賢

周書文閔明成宣諸子傳孝閔帝一男紀厲王康字乾安建德三年進爵為王仍出為總管利始等五州大小劍二防諸軍事利州刺史康驕矜無軌度信任僚佐盧奕等遂

繕修戎器陰有異謀司錄裴融諫止之康不聽乃殺融五
年詔賜康死

魏書宇文福其祖活撥任慕容垂為唐郡內史道武平慕
容活撥入魏為第一容福少驍果有膂力歷仕太僕卿瀛
州刺史性忠清在公嚴毅以信御人甚得聲譽後除都督
懷朔沃野武川三鎮諸軍事子延字慶壽體貌魁岸眉目
疏秀以員外散騎侍郎隨父在瀛州大乘妖黨入州城縱
火延突火抱福出支體灼爛鬚髮盡焦勒思與賊苦戰賊
乃散以此見稱遷直寢與万俟醜奴戰沒

又宇文弼字公輔父珍周宕州刺史弼慷慨有大節博學
多通奉詔修定五禮書成奏之從帝平齊以功拜上儀同
封武威縣公後轉南定州刺史隨開皇初入為尚書左丞
出為并州總管徵拜刑部尚書弼既以才能共稱歷職要
聲望甚隆重物議推許煬帝忌之誅焉為尚書孝經注行
世有子儉瑗

又宇文貴字永貴其先大棘人徙居夏州父莫豆干保定
中以貴著勲追贈柱國大將軍貴少從師授學輟書嘆曰
男兒當提劍汗馬以取公侯何能如先生為博士也正光

末破六汗拔陵圍夏州刺史源子雍嬰城守貴為統軍救
之破賊帥叱干騏驎入為武威將軍從魏孝武西遷大統
初遷右衛將軍貴善射有將帥才周文帝又以宗室甚親
委之東魏潁川刺史賀若統據潁川來降東魏遣其將堯
雄是云寶攻潁貴與戰雄敗走寶降廢帝八年代尉遲迥
鎮蜀時隆州人開府李光賜反于鹽亭與其黨帛玉成寇
金堂貴乃命開府叱奴興救隆州降之周孝閔帝踐阼進
位柱國武成初從賀蘭祥討吐谷渾貴好施愛士人以是
稱之子善位至大將軍上柱國

周書宇文測字澄鏡周文帝之族子高祖中山曾祖立績
祖麒麟父永仕魏並顯達測性慎密少篤學旬月不窺戶
牖大統六年除大都督行汾州事政存簡惠頗得民和後
拜太子少保卒測深字奴干性鯁直有器局周文帝時屢
著戰功持節大都督東雍州刺史深為政嚴明示民以信
抑挫強豪吏民懷之從弟神譽神慶幼孤深撫訓之義均
同氣子孝伯字胡三性沈正謇諤好直言武帝嘗夜從容
謂之曰公之于我猶漢高之與盧綰也賜以十二環玉帶
預機務武帝誅晉公護惟孝伯與王軌宇文神譽參預後

後皇太子無令德帝以孝伯為左宮正尉遲運為右宮正
宣帝荒淫孝伯頻諫賜死于家子歆嗣

魏書宇文虬字樂仁性驍悍有膽畧魏永安中除征虜將
軍大統時沙苑河橋之戰皆有功與王雄討平魏興除金
州刺史進位大將軍卒

周書宇文神舉周文帝之族子父顯和性矜嚴涉經史膂
力絕人挽弓數百斤能左右馳射與孝武定八關之策周
文帝知其善射射水旁一小鳥中之後為車騎大將軍卒
神舉早孤有夙成之量明帝初起家中侍上士留情篇什

每侍從游幸武帝誅晉公護預其謀平并州加上大將軍
平幽州之亂獲盧思道釋而禮之為并州總管宣帝忌其
名望賜酖酒卒弟神慶少有壯志武藝絕倫大象末位至
柱國

西魏書涼州刺史宇文仲和反州民張保害刺史以州應
周書宇文達字度斤突性果決喜騎射建德初出為荊州
刺史有政績武帝手勅褒美性節儉食無兼膳侍姬衣皆
故敝未嘗營貨產武帝東伐以為右軍總管為隨文帝所
害

隨書宇文愷字安樂杞公忻之弟少有器局好學博覽書記解屬文多技藝號為名公父子高祖踐阼誅宇文氏愷亦在殺中以其與周本別兄忻有功乃赦之及遷都以愷有巧思詔領營新都副監決渭水達河以通漕愷總督其事兄忻被誅除愷名建仁壽宮楊素薦之為將作少監營東都窮極壯麗帝北巡為大帳其下坐數千人又造觀風行殿上容侍衛者數百人離合為之下施輪軸推移倏忽有若神助夷狄見之莫不驚駭愷又博考羣籍為明堂圖議上之進位金紫大夫卒撰東都圖記二十卷明堂圖議二卷釋疑一卷子儒童游騎尉少子溫起部承務郎又宇文元塙奉使高麗為叱羅所拘數年始還高祖比之蘓武

按唐高祖時有司農卿宇文穎同州刺史宇文德照蘭陵人周武后時右司諫宇文鈞以直言遠貶后念之召為學士又蕤州刺史宇文鼎宗神錫與御史中丞宇文鼎受密詔誅鄭注使京兆尹王璠掩捕之璠密以堂帖示王守澄又異聞錄河南宇文鼎與李公佐夜話廬江馮媪事唐書武后神功元年殺右司員外郎宇文全忠

北夢鎖言道士程子宵登華山上方偶有顛仆郎中宇文翰致書戲之曰不知上得不得且恠懸之又懸

廣異記韓徹者以乾元中任龍州吳山令素與進士宇文覲辛稷相善並隨徹至吳山讀書兼許秋賦之給覲稷等于大槐樹穴中掘得一塚有棺木有少齒髮及脛骨髀骨徹命佐史以新棺埋之佐史偷錢以小書函折骨埋之至舍倉卒欲死徹令巫視之靈語已是晉將軍契苾鐸身以戰死受葬于此縣立塚在馬坊恒苦糞穢欲求改遷

唐書宇文籍字夏龜父涪籍少好學長于春秋右拾遺實羣表以自代登進士拜武元衡西蜀從事遷咸陽尉與韓愈同修順宗實錄遷監察御史後知制誥遷諫議大夫工部侍郎按舊書籍性簡澹寡合玩耽經史精于著述而風望峻整為時輩推重

宋史宇文之邵字公南綿竹人登進士為文州曲水令縣地狹人貧耕者止幾運使以經縑高其價鬻于民之邵言歲飢儉安可復因以求利神宗即位求言上書不報乃致仕年未四十自強于學不易其志范鎮司馬先皆稱之又字文昌齡字伯修雙流人登進士調榮州推官辟經畧

熊本幹當公事凡攻討招襲建南平諸城砦皆出其畫遷大理丞擢提舉秦鳳路常平後遷太常少卿議郊礼合祭竟用其奏知梓州徽宗立召為刑部侍郎徙戶部後以寶文閣待制知開封歷青杭越三州卒子常字權可政和末知黎州有上書乞於大渡河外置城邑以便互市者詔以以訪常常言自孟氏入朝藝祖取蜀輿地圖觀之畫大渡河為境歷百五十年無南夸患今若干河外建立城邑虜情攜貳邊隙浸開非中國之福也尋提舉成都路茶馬盡革其弊

又字文虛中字叔通華陽人登進士歷官州縣入為起居舍人國史編修上書言女真事王黼怒降為集英殿修撰又建十一策上二十議皆不報未幾金人分道大侵虛中奏宜降詔罪己遷資政殿大學士軍前宣諭使又入金營辯劫營非朝廷意再往訖請康王歸除簽書樞密使院事凡三往言者劾其割地罷知青州尋落職建炎二年詔復大學士為大金祈請使留金為學士後忌者告虛中謀反與老幼百口同被焚死孝宗愍之立其族孫紹節為後紹節字挺臣登進士第累遷寶謨閣待制知瀘州時韓侂胄

方議用兵紹節至郡議修築古城創造寨柵專為守圉計
徙鎮江吳曦叛謂大臣任安丙必能討賊卒誅曦除端明
殿學士卒

又宇文百之新津人性孝友數世不異居庭前六燕同巢
紫荆異本合幹

又宇文奉直熙寧中守懷安軍有功德于民及去民懷其
德不已繪象祀于紫雲山

又宇文公諒字子貞成都人後徙吳興幼有操行通經史
百氏言文宗至順四年登進士第授同知婺源州事後補

餘姚州夏不雨公諒出禱即應民頌之為別駕後官國史
院編脩出僉嶺南廉訪司事以疾致仕著有折桂夜光璧
水等集又著玉堂漫稿越中行稿門人私謚曰純節先生

四川志太平興國中進士宇文愚華陽人景德二年乙丑
科進士宇文之奇綿竹人慶曆二年壬午科進士宇文逸
成都人嘉祐二年丁酉科進士宇文冊雙流人李大臨稱
為西川顏子宇文之邵綿竹人嘉祐中進士宇文昭度成
都人熙寧中進士宇文昌齡雙流人刑部侍郎元豐中進
士宇文褒廣都人後易名邦彥元豐中進士宇文千之閬

州人字文彬綿竹人大觀三年己丑進士字文黃中雙流人政和六年自右史除中書舍人兼脩國史詳定九域志修神宗實訓八年言官疑其學術淵源蘇氏奉祠而去後知登通隨三州召為郎出提點京東刑獄子暘字入若紹聖進士官秘書少監字文虛中雙流人褒子簽書樞密院事政和中進士字文璞字文恒俱成都人紹興十二年壬戌科進士字文任成都人字文紹節雙流人紹興中進士字文畢成都府人乾道中進士字文華南部人淳熙五年戊戌科進士字文价舟稜人進士朝野雜記淳熙諒闇欲引見金國使人又在喪次歸而引見恐使人以為疑乞付礼官商議既而礼官字文子英价言祖宗以來雖居喪制未有不引見使人亦無不受礼物之文也從之

四川志字文子震雙流人著作郎守潼川字文襪雙流人守威州字文价雙流人兵部尚書字文任雙流人字文粹中廣都人邦彦子以文學累官尚書右丞李綱傳信錄粹中以右丞隨道君皇帝東幸字文閔中廣都人邦彦子字文時中廣都人賜進士第知潼川

周益公題跋字文渙二子審學問過人恬於進取連任岳

祠俱以詩名弟藏亦嗜學好脩有子曰适慶元己未擢第
距熙寧已百年而學不絕

宋度正脩中江縣志儒學記成都宇文峒為中江酒官始
至適科調煩興看山李侯皇以為材使兼縣事新學宮嘉
定十三年八月落成又創為一堂祠濂溪而下諸先生以
示學者趨向可謂知所本矣峒止止先生四世從孫也

陝西志宇文靖乾州人成化戊子舉人官推官宇文襄富
平人元進士宇文銘乾州人進士

武

見風俗通

風俗通漢有武臣按武臣秦末人為趙王

史記武涉盱眙人有口辯項羽使說韓信以三分天下不
從

功臣表高祖時鄒梁侯武彪子最最子嬰齊嬰齊子山柎
坐酎金除傳六代後居沛國

百官表大司馬司直沛武襄君孟為右扶風又為宰衡護
軍京兆尹遷中郎將

漢書王莽積弩將軍武讓

馮異傳更始河南太守武勃

姓苑漢有祭酒或忠望出太原

隸釋漢督郵或班字子翁官執金吾丞敦煌長史或榮字
含榮治魯詩韋氏章句或梁字綏宗從事掾

晉書或陔竹邑人字元夏沈敏有器量與二弟韶叔夏茂
季夏並總角知名劉公榮曰皆國士也陔魏明帝時遷下
邳太守泰始初拜尚書掌吏部遷左射僕

晉書或茂為尚書揚駿使入宮觀察事勢後為孟觀殺
唐書或平一名甄以字行博學通春秋或后時畏禍不敢
與事隱嵩山脩浮屠法景龍初兼脩文館學士崔日用自

言明左氏春秋諸侯官族折平一曰君文章固耐久若言
經則敗績矣時崔湜張說素知平一該習勸令酬誥平一
乃請所疑日用曰魯三桓鄭七穆奈何答曰慶父叔牙季
友桓三子也孟孫至蒞凡七世叔孫舒季孫肥凡八世鄭
穆公十一子子然及二子子孔三族止子羽不為卿故稱
七穆子罕子駟子良子游子國子印子豐也一坐驚服平
一問日用曰公言齊桓公楚莊王時諸侯屬齊若楚凡幾
平公靈公時諸侯屬晉楚凡幾晉六卿齊楚執政者何人
日用不能對孫元衡儒衡元衡字伯養堅正有守詔以吏

部尚書兼門下侍郎平章事為劍南西川節度使綏靖約
策儉已寬民三軍上下充實八年詔還東政為賊害儒衡
字廷碩姿壯秀偉不妄言與人交始終一節以諫議大夫
知制詔皇甫鏞以宰相領度支剝下以媚上儒衡疏其狀
以疾惡太分明不至大任

或安氏見英賢傳

英賢傳漢有乘黃令或安恭按乘黃令一作千乘侯

或疆氏見風俗通路史

或陵氏此姓諸書無今補

風俗通九江太守或陵威生不識母常自悲感游學京師
遭于陵谷中見一老母年六十餘因就問母姓為何曰陳
家女李氏何故獨行曰我孤獨欲依親家子威再拜長跪
自白曰子威少失慈母姓陳舅氏亦李又母親亡親同年
會遇于此乃天意也因載歸家供養以為母

或城氏見風俗通

定三年傳蔡侯吳子唐侯伐楚左司馬或戍與子常謀濟溪
而伐之或城黑曰吳用木也我用革也不可久也不如速
戰注黑或大夫而風俗通云漢有或城里訛

或羅氏見世本

古琴疏帝相時條谷國貢桐與芍藥帝令或羅伯植芍藥于後苑

或都氏見廣韻

西秦錄乞伏國仁以或都勇士為右輔按姓氏該引作或羣右輔者誤

或信氏見路史

或仲氏見氏族畧

甫
見風俗通姓纂

按史記索隱鄭大夫甫瑕即左傳甫瑕

唐南蠻傳貞元中嘉州綏山縣婆籠川生獠首領甫积兄弟誘生蠻為亂剽居人西川節度使韋皋斬之

宋史盧斌傳富順監蠻酋甫羌一斌招諭軟血刻石盟而遣之

氏姓謹甫輕黔陽人官弋陽縣甫轍六合人成化中官永豐知縣按甫輕弋山堂別集作甫經

甫奚氏見英傳按宜作甫爽

姓纂引英賢傳云龍驤將軍甫奚置按賈執所言甫奚置

不知何代人疑林氏引有脫字

甫爽氏見世本

世本宋大夫甫爽文叔

府 見風俗通

風俗通漢有司徒掾府悝

父 見韻誼

博古圖有父已父癸父舉父舟

按呂覽吳有父之儀今本作文之儀墨子作文儀作文者是

母 按蜀中母姓為父母之母與母音無母音貫者不同

巴郡太守張納碑陰有掾史母俊辭曹史江州母龜

蕪陽國志梓潼荆子獲杜孟治漢國功曹母建荷擔杖曰

吾一國大夫國也不能存終不屬賊也餓死谷中

蕪陽國志晉母雅巴郡江洲人學冠四科貢于朝除涪陵

漢平令忠義著于奉上宏毅彰于接下西南夜郎跋扈以

為夜郎太守殊俗感其惠化致仕歸年八十三卒按一作

母稚

唐書賊帥母端兒率眾數千薄于龍門城下高祖從十餘

騎擊之賊大潰

按唐書母暎為集賢學士即含象亭十八學士之一暎初為右率府曹曹將軍開元時被詔與馬懷素等校正秘籍藝文志與古今書錄四十卷開元內外經錄十卷

大唐新語右補闕母昃博學有著述上表請修古史先撰目錄以進宗稱善賜絹一百疋性不飲茶著代飲茶序其畧曰釋滯消壅一日之利暫佳瘠氣侵精終身之累斯大獲益則歸功茶利貽患則不謂茶災豈非福近易知禍遠難見乎後直集賢無何以執疾暴終初夢著衣冠上北

邨山親友相送及至山頂迴顧不見一人意甚惡之及卒僚友送葬北邨果如初夢宗聞而悼之贈朝散大夫按一引作母暎事又或作暎

倣戒錄蜀母乾昭有莊在射洪往攸刈有麻遭射逐之驚忙走投乾昭鄰僧法惠笑曰天送食物豈宜輕舍乃殺之沽酒炙麻僧方食一塊大叫曰刀割我心嘔血而死

宋史母昭裔河中人為蜀相鏤五經板子守素拜工部侍郎代父判鹽鐵領彭州刺史奉親勤至雖隆暑莫歸必朝服執簡以申昏定之礼入宋歷轉運使卒子克勤補三班

奉職克溫賜緋克恭尚孟昶女任光祿寺卿入守至右監
門衛將軍按十國春秋昭裔著爾雅音略三卷守素字表
淳工部侍郎作工部尚書揮塵錄昭裔貧時常借文選于
交游其人有難色發憤曰異時若貴當板以鏤之遺學者
後仕于蜀為宰相遂踐其言

四川志母印安仁人善事父母母卒葬西湖朝夕哭奠風
雨不輟

宋史母制機蜀人宋末分教黃州兼領雪堂河南兩書院
學者稱平山先生

蜀人物志母夢牛巴縣人初授樂源尉優于吏事茂著廉
聲累至文試院官至承直郎有全歸集行世

四川志元有母泌南安路總管克修其職

四川志明母崇正崇禎時由選貢知桂東縣十六年張獻
忠陷衡郴崇正守死不去母祥劍州人洪武中國學生除
礼科給事中轉礼部郎中巡視湖廣沙汰官吏歷太僕少
卿母誠蓬州人天順舉人任知州母恩蓬州人宏治進士
知臨海縣卓有賢聲升湖廣道御史著家礼考何孟春傳
大理寺丞母德純南充人諫大礼哭左順門戍鄖陽開館

授徒尋復職升尚寶卿

氏姓謚母懷慶直隸天津人由舉人崇禎間任慶陽推官
陝西通志母育寧州人正德三年丁卯科舉人官大足知
縣

主 見潛夫論路史

漢功臣表高陵園侯主虞人以騎司馬漢王元年從起廢
丘以都尉破田橫龍且追籍至東城以將軍擊布侯高后
三年侯弄弓嗣孝文十三年侯行嗣孝景三年謀反誅
列仙傳主柱不知何所人與道士共上宕山與邑令宰君

明餌沙三年得神沙飛雪服之五年能飛行

五代史主祿為潁州團練使

統謚洪武己卯科舉人主問礼益都人任主事又安樂人
主明洪治中任崇德縣訓導

主父氏見姓謚

漢書齊相主父偃臨淄人初學長短縱橫之術晚乃學易
春秋百家言

氏姓謚宋有主父宗旦為將仕郎生天經天經生主簿齊
賢齊賢生喆字穎叔政和五年上舍開封人

卷之三

